

Šën se trätela dl titul!

Finela de Schach ai 27 de merz 2010 a Ridnaun: trëi scudades possa mo vëncer l titul, danter chëstes nce l Gherdëina



Thomas Moroder y Christian Grossi, la quarta y quinta mëisa dl Gherdëina.

Schach - Serie A: Tl nono y decimo turno à l Gherdëina I cialà de fé plu ponc che la va. Ai 27 de fauré n cesa iesi stac boni de bater la segunda scudra dl Kaltern/Tramin per 5 a 1 cun la vëntes de Stefan Moroder, Ruben Bernardi, Rainer Demetz y Christian Grossi y la remis de Thomas Moroder y Franz Prinoth.

Oradecà à l Gherdëina ai 13 de merz batù l Persenon/Milland per 5,5 a 0,5 cun la vëntes de Ruben Bernardi, Rainer Demetz, Thomas Moroder, Christian Grossi y Franz Prinoth y cun la remis de Stefan Moroder.

Sceben che te tramedoi partides fova l resultat ala fin bel tler, ti àl mpo custà nia puecia fadies y l à ulù vester na gran cunzentrazion per i arjonjer!

Dan la finela dl 27 de merz a Ridnaun à l Gherdëina manteni la segunda pozizion tla classifica dla seria A cun 17 ponc y 42,5

ponc de mëisa. Al prim post iel l Kaltern/Tramin I cun 18 ponc y al terzo l Richter/Lask de Bulsan cun 17 ponc y 40 ponc de mëisa.

Chël uel dì che l Gherdëina, vencian l'ultimo turno propi cun i prims te classifica, pudëssa se fé sie l 14ejim titul de si storia. D'autri resultat pudëssa al'incontra monce mé purté al cuarto post. Perchël iel da se aspité na finela plëina de "suspance"!

Serie B

Manco de bona nutizies iel da repurté dala segunda scudra dl Gherdëina. N cësa àn perdù l'ancunteda cun l Eppan per 1 a 4, ulache Bruno Goller y Richard Moroder à arjont na remis.

Oradecà à l Gherdëina II pona perdù cun l Passeier per 1,5 a 3,5. Chëst iede à Bruno Goller inò venciù y Johann Grossrubatscher à fat remis.

Šën ie l Gherdëina II da abiné al otavo plazamënt dla classifica de serie B cun 10 ponc y perchël nia dalonc dala zona de chëi che toma ju. L'ultima-partida tla finale a Ridnaun contra l Merania sarà perchël dura assé.

Serie C

Ti play off dla serie C—est à l Gherdëina III perdù de misura cun l Leifers per 3 a 2. Manuel Taschler y Hans Delago à venciù si partides. L'ultima sada ti iel pona garatà na bela vënta cun l Eppan II per 3,5 a 1,5, cun la vëntes de Manuel Taschler y Valentine Demetz y la remis de Pauline Taschler, Markus Delago y Ernst Demetz. L resta mo da jughé l ultimo turno cun l Gries II. Al mumënt ie la terza scudra dl Gherdëina al terzo post.

Turnoi weekend ndividuel de Montebelluna

Sun 34 partezipanc à l president Ruben Bernardi arjont l decimo post cun 3 ponc sun 5 partides pra l turnoi de fin dl'ena dai 5 ai 7 de merz a Montebelluna. Cun gran sudesfazion iel tlo da repurté si bela remis cun l prim classificà, l IM Axel Rombaldoni de 2.439 ponc Elo.

Grand Prix di Jëuni a Bulsan

N sada ai 6 de merz pra l Grand Prix di Jëuni a Bulsan ie Nadia Kasslatte ruveda 15ejima cun 4 ponc sun 7 partides y sun 54 mutons y mutans sot a 12 ani, vencian a chësta maniera si prim turnoi dl Grand Prix di Jëuni tla categoria mutans sot a 10 ani. (rd)